

Téerëe débpi biniyú unna won Pool bëy Tesalonik ra Kúnsëe

Pool daa bini bëy ílí jañii Tesalonik unni yeh. Tesalonik nék, di húmú gin gaan, bi hom hébis muluɓ te lom a yaay húmú títé nè lool, haanoh ala ñéerë' a pagadɗ bos húmú caakke na ɓal. Aya' Pool daaha ra, di cëgídté goomal bëewí gémúté Yéésú daaha, ndaa di maañay na ndah lahte yëwúɗdí hatlute ri, di kolohte saañce Bere (Saame Tílëdí apootarra 17.1-10).

Hompe nii filoon fe, di hom Korente, Timoote fa ɓani na ñéerúu légéy rë deeffe ri daaha léhínté rí yee beya' ri Tesalonik ra (3.6). Unna léhínú Pool ra sosil keeña soslo níi di yampe na bini unni yeh, kéyrë'té wë bëy Tesalonik, na sím Koope di dee na yeeluu bëewë hatni baaha bëy Tesalonik, bee lofuu wa pesadɗ ra (1.7-10). Di nérsëhté légéyë húmú légéy rí filiɓ fi wa ra, na won dee faha' ri waa olaat ra. Di gíníkké wë di yee na húmú halaatu wa sun fi kolohi ow búudé rë.

Di wonte wa :

- yii lenke dee gémúu wë rë (1.2-10),
- yii lenke tílëdí di Tesalonik (2.1-12),
- yii lenke tílëdë faha' Koope ra (4.1-12),
- a yii lenke nimili Yíkëe (4.13 níi 5.11).

Bëyí fí jañi téeríi bee béeb ay ot biti iña filiɓ mín yúun bëewë lahu nuf ana di yii lenke dúmëení pesa ra. Di ay yúh biti ɓal bëewë gémú

Kiristaa na ra nonu bëy niiña, wa ham híin biti fayu raa, wani Yéésú nay home. Baa daa lukki lah solo !

Wodohi Pool bëy Tesalonik

¹ Don fi bëy ílí janjii Tesalonik fa nonu bëewí Baap-Koo a Yéésú-Kiristaa Yíkée rë, so' mi Pool, funi Silaas a Timoote, fun na woduu ron. Koope líhë rën mal, on don jaamma.

Dee gémúu bëy Tesalonik Yéésú në rë

² Fun na símú Koope faraaah ndah don bééβ, fun mësúy don hal filib danji fun. ³ Nuffi fun na koleeh don na biti fun home danji Koo, di fi Boffi yen, di iña na pagu ron ndah gémë gémú ron Yéésú-Kiristaa Yíkée rë, a pagadon ndah faha' fahuu ron ri ra, a yaakaara dékúu rën lah dii na ra. ⁴ Koy-yaayyi yee Koope faha'te ron yee ra, fun yúhúté biti daa ri tanis don, ⁵ ndah na waariyu fun don Uni Neba ra, húmú teyay won don, ndaa húmú ñéerë' a doole, a Ruuh-Pesëj, a ngémí híinté. Don olute dee húmú homuu fun don na, komi ron yii wunte don na ra maan ? ⁶ Te don, don ñeyute kotti fun a kotti Yíkée bee tahuu ron Una ra. Tahuu ron ri ra nék, don deyute coono ndaa Ruuh-Pesëj tahte keeññon sosse. ⁷ Daaha, bëewë gémú te dékú Maseduwaan a Akaay ra bééβ yeeluu don na. ⁸ Af don tahte unni Yíkée teyay Maseduwaan a Akaay don, ndaa hasla'te gina bééβ ndah gémë gémú don Koope ra hente lëyëj. Kon miteh fun wonle yin na. ⁹ Bëewë gonluu sun fi dee habuu don fun ayuu fun don na ra. Wa na wonu bal sun

fi dee súugúu don yúullë don yíssúuté Koope na, jaamiyohi dī fa na pes te daa kaaf ka ra ¹⁰ a sehaalohi kola'i Koohi Yéésú sun cép feey ra. Di fi Yéésú fa dī kélícf dī búudé rë, sëmlë'té yen níi yen ay múc neebi Koope yiin bis-këem.

2

Tílëdí Pool di Tesalonik

¹ Koy-yaayyi yeh, don yúhruté affon biti sah aya húmú ayu fun ginon da pëtíh neh. ² Don yúhuté biti bal, balaa baaha fun maluute sol te fun ñeyute mok di Fílíp. Ayuu fun ginon da bal, fun maluute tolof tolof caak daaha, ndaa Koope habra'te fun níi fun waariyute ron Uni Neba te fun neehuy na dara. ³ Te na waariyu fun da bééβ, fun tíkúy wonni fun sun fi yii lahay, fun tíbúy në nuf bos, te fun saamuy na nofa' ow. ⁴ Fun kay, fun waariyuu Uni Neba dee faha' ri Koope ra. Di otte biti fun mínú rí, daa tah dī déjéén fun dī. Fun saamuy yii neba' ow, fun saamu yii neba' Koope, dī fa na olsoh níβbí fun ra. ⁵ Don yúhuté biti fun mësúy jay ow, te fun mësúy ñeya' wonni fun fun saame yin ow na. Koope yúhté baaha ! ⁶ Fun saamuy kañ ow na : don na neh te ow kay na neh ; ⁷ te añcañ, fun mínú ron cagoh koon don pañ yee fahuu fun da ndah fun apootarriKiristaa, ndaa fun paguy ri ! Fun kay, fun sosu soso filib fon ti belii na tooppitoh koyyi nen. ⁸ Pokoha pokuu fun don na ra tahte fun húmú teyuy waarii ron Uni Nebi Koope kep, fun bokute a don pes, ndah fun fahuute ron níi faha'.

⁹ Koy-yaayyi yeh, don nérsúuté dee húmú mokuu fun níi mok da maan ? Fun húmú légyúú yíi ñamun fun légyéé na' a elek, kaa' fun mokil ow yíně sah don na, na húmú waariyu fun don Uni Nebi Koope ra. ¹⁰ Don mínú fun díi seedeyid, te Koope mín fun díi seedeyid bal biti dee tílúu fun a don fa gémú rě lante, júbpé te tikéhté waal. ¹¹ Don yúhúté biti dee tílúu fun a ow fi ow don na ra béeb, man hanndal baap a koyyi nen : ¹² fun líkínúté ron te fun onute ron doole, fun caguute don nda don pes pesada neba' Koope, dí fa na dēek don, don non Nguur ki a ndami ra.

¹³ Yee tah fun ay dékée símí Koope ra biti bal : liiluu ron Un Koope fa komu fun don da, don habute ri, te don habuuy ri ti di na habuu un ow kese nen. Don habuu ri biti dí Un Koope, te ri Un Koope kaah. Una ee pañ yíi wunte don fa gémú Yéesú nē rē. ¹⁴ Koy-yaayyi yeh, don ñeyute kotti bëy ílí jañii Yúdée yē gémú Koope te nonu Yéesú-Kiristaa na ra ndah di mokluu wa yēwúddē, bëy ginon mokluu ron daaha bal. ¹⁵ Wa fi yēwúddē hawute yonente ya húl, hawute Yéesú-Yíkēe, moklute fun níi mokil. Wa nebuuy Koope, fahiruy ow yin wun, ¹⁶ kadduute fun waarii heetti kayya Una mín tah wa múc dē. Wa homute na baatuu bakaad rek na suu níi bakaaddi wa mitte, neebi Koope keente sun fi wa.

Faha'i Pool nimil oli bëy Tesalonik

¹⁷ Koy-yaayyi yeh, fun nék fun húmú koluute don na fun suute, ndaa fun sayuy faraah. Fun húmú lahuy fehey saañi fun, ndaa keeñni fun

húmú kolaay don na. Fun húmú kosuuy biti fun ay ron tikíl íl, tahte lahay yii paguy fun nda yii baa mín lah ! ¹⁸ Fun húmú habute biti nagajek fun ay nimil ginon, te so' mi Pool mi étídté rí i waal, ndaa Seytaane daa na yah waali fun. ¹⁹ Kon henay don moos, heneh ow kay ! Don daa yaakaari fun, don daa sësdfú keeñni fun te don daa baanii ndama nay teebee biti fun bagute níi fun damoh fii Yéesú-Yíkëe yiin nay rii aye ra. ²⁰ Wa don kay ! Don daa ndami fun, te don daa sësdfú keeñni fun.

3

¹ Sehuu fun níi fun mínlih rë, fun olute biti yee gén dë daa ri biti funi affi fun tas Aten ndín, ² fun yeñ koy-yaafi fun Timoote don na. Di fi baa funi daa boku fun na légéyú a Koope, waarii Uni NebiKiristaa. Fun húmú yeju ri don na oni ron doole, nda don baatti hínndëh don ham ngémë, ³ ow di don na banti yedfoh ndah mokla na moklu don da. Don yúhruté affon biti sah yaa béeb non iña waayid' yen Koope ra. ⁴ Nagajek, húmú homuu fun don na ra, fun húmú wonute don biti yen ay moklu, te don yúhuté biti daa ri yee lah woteh bee ra. ⁵ Yii baa daa tah seha' mi níi mi mínlih rë, mi yeñce Timoote don na kénsëhí tígë teem ngémën dë. Mi húmú sídë' biti Seytaane fiir rën, iña légéyú fun don na ra béeb sooy teem daaha.

⁶ Kola' Timoote ginon nimilte fun na ra, kompe fun unni neɓpe keloh di yii lenke ngémën a dëe fahuu don ow ra. Di wonte fun biti bal nuffon húmú homa' fun na faraah níi don ñamaasee, te

don húmú sesuute oli fun ti di sesuu fun olaadi ron nen. ⁷ Don fi koy-yaayyi yi yeh, yii baa tahte homuu fun filiḅ sáfúñ fí fun a filiḅ coono fi fun béeb dë, fun baatuutee lah doole ndah ngémèn. ⁸ Fun lëeysírúté keeñ leegi hém daa ron habu hín Yíkëe në. ⁹ Fun ay símée Koope dí níi mit ? Don tahute keeñni fun sosse níi sos fiyí ! ¹⁰ Fun dékúu ḁaṅi na' a elek, nda fun mín don tíkëet il ngëey níi fun mitsid' yee tasa' ngémèn dë.

¹¹ Démíin Koope, dí fi Boffi yen, a Yéésú Yíkíi yen parid' fun waala yulid' ginon da ! ¹² Yíkëe ona ron, don baatee fahanta' hanndal kon níi tígí teem fahanta', a hanndal ki doni bëewë béeb ti di fahuu fun don nen. ¹³ Hen ḁaaha raa, Yíkëe ay ron on doole níi yiin nay aye Yéésú Yíkíi yen, ñéerë' a bëewí béeb rë, don lan ces níi don lëhíh yii wonun sun fon, don caga' wun fíi Koope, dí fi Boffi yen.

4

Tílëdë faha' Koope ra

¹ Leegi nék koy-yaayyi yeh, fun teebute ron dee waruu ron pesa' níi don neba' Koope ra, te fun yúhúté biti don pesuu ḁaaha níi a deh. Kon fun na líkínú ron te na ḁagu ron di tii Yéésú-Yíkëe biti don baatti ham hín, ² ndée, don yúhúté túuyë' yë teeḅu fun don ra, te wa d'uhë' Yéésú-Yíkëe në. ³ Koope faha' biti don lan, te lani baa daa ri bitih : don moytoḅ paṅ yii tappe njaaliyoh béeb, ⁴ ow fi ow don na béeb

ham afi sùtèrèl faani, ñéerè' a lan*, ⁵ fah-beleḅ ban dīi kùrèelèh ti bëewë nènìh bëewí Koope ra nen, wa fa yíh Koope ra. ⁶ Ow banay tooñ moroomi filib yee wonu baa ra ndín leḅ yii daa ri laha' ri. Fun húmú wonute ḁon biti Yíkëe ay keen sun fi bëyí paḅ mani pagadḁi yah. ⁷ Koope dëekëy yen paḅ yin bos, ḁi túuy yen lan. ⁸ Kon bëyí faaliyaay yee wonu baa ra, ḁeef ḁi faaliyaay won ow neh, ḁi faaliyaay Koope fa on ḁon Ruuh-Peseḅ ḁa.

⁹ Yii lenke fahanta' hanndal kon, miteh ow won ḁon yin na, Koope yëedídté ḁon baaha níi wocce. ¹⁰ Daa ri yee teeḅu ḁon koy-yaayya Maseduwaan bééḅ ḁë, ndaa kaa'eeh fun won ḁon biti ḁon baat ya' yon, ¹¹ ḁon paḅ bééḅ ḁon pesa' jaamma, ow fi ow ḁon na bééḅ tooppitoh ñiñi afi, ḁon yuloh légéy ḁon kúḁ affon, ti di húmú wonuu fun ḁon ḁi nen. ¹² Hen ḁaaha raa, bëewë gé múy rë ii ron yap te ḁon ii seh dara ow na.

Yiin nay nimile Yíkëe rë

¹³ Koy-yaayyi yeh, fun fahuu biti ḁon yúh yee homuu bëewë húlúu a ngémí wë Kiristaa na ra, ḁon banti tík misiga keeññon níi lukus ti bëewí kayya lahuy yaakaar ra nen. ¹⁴ Yen gé mú biti neh Yéésú húlté te ri kolohte búudé è ? Ti ḁaaha nen, yen gé múté biti bal Koope ay kélíḁ bëewë húlúu a ngémí wë Yéésú nè rë. ¹⁵ Cëe fun bílíḁ ḁon yee won Yíkëe rë : bëewë nay lísée pes yen na níi a baaha ra, wa fa nay maasee nimili Yíkëe

* **4:4** 4.4 ow fi ow ḁon na bééḅ ham afi sùtèrèl faani, ñéerè' a lan :Lahte bëewí habuu ri ḁeh : ow fi ow ḁon na bééḅ koloh saam beleḅ raa, lah ñeyaa ri waal.

rë, wa ii këllëh bëewë húlú rë. ¹⁶ Yiin fin fa, wa ay keloh uni diŋke, un kélfë malaaka a un kúlúß ki Koope tiil, di fi Yíkëe kola' sun cépé. Bín fë rëe, bëewë húlúu a ngémí wë Kiristaa na ra nay d'ébée koloh, ¹⁷ bëewë nay lísée pes níi a baaha ra, anti béyrú wa ñéerë' a wa filiß nérrë, wa tee'ee a Yíkëe sun. Hen daa raa, yen fa gémú d'ii na ra bééß yen hom a di faw. ¹⁸ Kon, lah ënëntíi doole a unni yah.

5

Nimili Yíkëe sehuun a teey

¹ Koy-yaayyi yeh, di yii lenke wahtaa a jamanaa nay nimile Yíkëe rë nék, miteh fun won don yin na, ² ndah don yúhruté affon biti yiin nay nimile Yíkëe rë ay beettiya' ti lohoh elek nen. ³ Tígë nay habee bëewë biti homuute jaamma, lahuy dara yii sídúun wë rë, gina ay yípée bëp affi wa daaha, ti di na yíppi haba' loo beleb nen. Ow ii naa mín fús. ⁴ Ndaa don fi koy-yaayyi yeh, bi homuy don ñúusë, bisi baa ii ron beetti ti di na beettiya' lohoh nen. ⁵ Nagajek don bééß, don nonu bëy niiña, don tílúu na'. Yen nëníh bëy elga, bëy ñúusë. ⁶ Kon, yen banuy nee' ti di na nee'uu bëewí kayya nen ; yen yeelun yen teey. ⁷ Bëewë në nee'u ra nee'uu elek, yee na maniyu ra maniyuu elek, ⁸ ndaa yen fa na tílú na' ra, yen warun teey teeyo. Yen habun ngémë, yen faha' ow wa hen búuß tül yen na, yen haba' yaakaari mújë baane haa'aa yen na. ⁹ Ndée nagajek, Koope cagay biti di ay kéeníd neebi sun fi yen, di caŋ biti yen haal mújë nay

onee Yéésú-Kiristaa Yíkée rë. ¹⁰ Kiristaa húlídté yen. Daaha, bisa nay rii nimile ra deefa yen pesun peso mbée yen húlún húlë bééβ, yen ay pes a dí. ¹¹ Kon βéetíi onanta' doole, don tojanta' filiβ ngémë ti di na pagantuu don dí nen.

Iña míllúu wëe túuy dë

¹² Koy-yaayyi yeh, leegi fun fahuu biti bëewë homu filiβ fon na moku, Yíkée nah wa níidí don a líkíní don ra, don yed' wa cér. ¹³ Hëbí wë, don faha' wa níi faha' ndah légéyí wë. Pésíi jaamma filiβ fon.

¹⁴ Koy-yaayyi yeh, fun ee ron wonu ra ee : líkíní dëpësídfë, don ben bëewë neehu ra, don habra' bëewë gooyu ra, don mújíd bëewë bééβ. ¹⁵ Mëytíi yíllëntë' bos filiβ fon ; sëemí wuna faraah hanndal kon a hanndal ki doni bëewë bééβ. ¹⁶ Pésíi sos-keeñ faraah, ¹⁷ don déké' dan. ¹⁸ Yii mín don homa' bééβ don sím Koope. Baa daa yee faha' ri pesi don fa nonu Yéésú-Kiristaa na ra. ¹⁹ Ngënë kée'íi pagadfi Ruuh-Pesen, ²⁰ ngënë hégií unna léhínú kola' Koope na ra. ²¹ Kénsíi wë bééβ, don ham yee wun da ; ²² yii hente bos bééβ don moytoh ri.

²³ Di fi Koope fa na ona' jaamma ra ladla don ces ; dí níirë níbbën, níid' keeññon a faannon bééβ níi ow laheh yii wona ri ron, yiin nay nimile Yéésú-Kiristaa Yíkíi yen da. ²⁴ Koope fa dëek don da, yii won dí bééβ dí pañ ri, te ri ay ron rii pagiree daaha.

²⁵ Koy-yaayyi yeh, lah d'égírí fun ßal. ²⁶ Lah wëddí fun koy-yaayya bééß níi wodoh*. ²⁷ Mee ron rii won ra ee di tii Yíkëe, lah léhíní wë bééß unni yah.

²⁸ Yéésú-Kiristaa Yíkíi yen líhë rën mal !

* **5:26** 5.26 Di ßaahi ßëewí yaaha, wa yahti wodoh ßëewë mboko yi wa mbée ßëewë meeru wa raa, wa fëenúu wë fëenëe.

Séréel Ndút: Unni Koope

Ndut: Séréel Ndút: Unni Koope (New Testament+)

copyright © 2020 Wycliffe Bible Translators, Inc.

Language: (Ndut)

Contributor: Wycliffe Bible Translators, Inc.

All rights reserved.

2020-11-20

PDF generated using Haiola and XeLaTeX on 21 Feb 2024 from source files dated 29 Jan 2022

a3a1238b-9393-5875-a4c5-1d3f38537bfe